

'Saya bukan orang tengah Najib, Tun M' - Ku Li
Astro Awani
Ogos 15, 2015
Rahimah Abdullah,

KUALA LUMPUR: Tengku Razaleigh Hamzah menafikan beliau menjadi orang tengah dalam krisis melibatkan Perdana Menteri, Datuk Seri Najib Tun Razak dan mantan perdana menteri, Tun Dr Mahathir Mohamad.

Katanya, sebarang penglibatan orang tengah hanya akan mengeruhkan keadaan selain mengelirukan rakyat.

"Saya tidak mahu campur sangat. Saya nak tengok keadaan ini tenang dan tidak akan menimbulkan kekeliruan dengan rakyat," kata Ahli Parlimen Gua Musang itu kepada media semasa ditemui di Rumah Terbuka Aidilfitri Persatuan Anak Gua Musang di ibu negara hari ini.

Dalam pada itu katanya, sebagai orang lama dan dihormati dalam politik, beliau mengakui ada berjumpa kedua-dua pemimpin itu untuk memberi pandangan mengenai isu-isu berkaitan.

"Saya sudah berjumpa dengan Najib dua kali. Beliau ada jemput saya untuk beri pandangan dan nasihat tetapi tidak perlu saya beritahu apa intipatinya kerana itu adalah perjumpaan tertutup. Saya berjumpa beliau sebelum Raya.

"Tun M pula saya jumpa baru-baru ini. Itu pun *private* tapi saya jumpa semua orang," jelasnya.

Sebelum ini, ada beberapa pihak pernah menyeru supaya satu pertemuan khas dibuat antara Najib dengan Dr Mahathir yang memfokuskan usaha menyelesaikan kemelut dan krisis termasuk merungkai persoalan utama melibatkan isu syarikat pelaburan strategik negara, 1Malaysia Development Berhad (1MDB).

Dr Mahathir juga pernah menyatakan beliau bersedia untuk mengadakan pertemuan empat mata dengan Perdana Menteri.

© 2015 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-politik/saya-bukan-orang-tengah-najib-tun-m-ku-li-69969>